

四庫全書

集部

# 欽定四庫全書

集部

樵雲獨唱

目錄  
卷二

詳校官檢討 臣 德生

中書臣 劉源溥 覆勘

覆校官中書臣 汪學金

分校官學正 臣 卜惟吉

謄錄監生 臣 陸潮愈

欽定四庫全書

集部五

樵雲獨唱

別集類四元

提要

臣等謹案樵雲獨唱六卷元葉顥撰顥字景

南金華人志行高潔結廬城山東隅名其地

曰雲顥自號雲顥天民是集乃其孫雍所編

前有自序謂新桂老而雲山高寒音調古而

巖谷絕響故名曰樵雲獨唱序凡二篇皆題

至正甲午而集中多載入明詩且後篇乃明興後語疑原本後篇未著年月傳寫者誤以前篇年月補入也顧嗣立元詩選曰列朝詩集載葉樵雲顓字伯愷洪武中登進士官行人司副免歸按集中挽林荆山上人云大德庚子春生我及此公以年計之當洪武戊申景南年六十有九矣其獨樂歌云屈指今年七十五集中詩皆高曠之言絕無及仕宦者

袁布政凱序云使先生後生數年際我朝之  
明盛與一時俊乂並列庶職其事業必有可  
觀惜其不然而徒於言語文字間見之其志  
不亦可哀乎袁序作於成化間不應有誤列  
朝詩集所載未知何所據也又震澤編載東  
山葉顥字伯昂嘗以鄉貢為和靖書院山長  
則又一同名姓者耳云云其辨甚明案太學  
題名碑建文庚辰科有葉顥亦金華人庚辰

為建文三年革除以後稱洪武三十三年列  
朝詩集當必因此而訛嗣立尚未之詳也其  
詩寫閒適之懷頗有流於頽唐者而胸次超  
然殊有自得之趣天機所到固不必以繩削  
求矣乾隆四十一年十二月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

集部五

樵雲獨唱目錄

別集類四元

卷一

古詩上

卷二

古詩下

卷三

絕句上

卷四

絕句下

卷五

律詩上

卷六

律詩下



樵雲獨唱原序

予誅茆結廬於城山之東隅林深而木翳水秀而峰奇  
居處孤峻名其庭曰雲顥閉門却掃謝賓客日與樵夫  
芻叟盤礴乎丘園林麓之中披雲嘯月釣水採山無少  
休暇久之移家城山之西隅負郭而樓居形勢虛敞牕  
戶軒豁而南嶼北巘爭獻奇秀其儼然之容蒼然之色  
入吾屏几清致復不減於雲顥也東西相望不數里故  
吾得以幅巾便服輕鞋瘦策從樵夫芻叟相往還於其

間山回路轉川鳴谷應伐木之丁丁鳥聲之嚶嚶更喚  
互答斯樂何極斧斤之餘濁酒自適觴詠談笑擊壤賦  
詩以唐律五七言二百餘首雜詩若干首雖不足以闢  
世教之盛衰亦足以叙幽情寫閑適之興懷名其秩曰  
樵雲獨唱蓋予知樵夫芻叟相與之娛而不知世俗之  
好樵夫芻叟知從予之游又不知予賦詩之趣薪桂老  
而雲山高寒音調古而巖谷絕聽得不謂之獨唱乎幸  
而樵芻中有如朱翁子陶靖節輩固將甘心與之揖遜

周旋賡和酬酢商度古今天下治亂之得失評論高人  
與士出處之始終豁疇昔風誼之氣吐平生慷慨之辭  
散為箴規發為歌詩峭拔俊爽雍容舒徐放而縱之而  
言不肆收而藏之而文不拘振清風於亘古流遺響於  
無窮者也樵唱之樂無以易此不幸而世衰道微斯人  
儻不復見則予長抱山阿寂寥千載誰賞之歎而獨唱  
之旨其有以夫時至正甲午重九前四日雲巖天民景  
南葉顥序



欽定四庫全書

樵雲獨唱卷一

元 葉顥 撰

古詩

玩月

天濶海波平飛空一鏡明  
烏栖烟樹冷蟾浴石潭清  
素魄流金液孀娥舞玉京  
周旋雲鬢亂縹緲羽衣輕  
短世空老長生藥未成  
桂林秋萬頃茅屋夜三更  
芳砌鋪冰雪疎簾颺水晶  
穿窓微美色當戶寂無聲  
屢動哀宏

興狂呼庾亮名神光億萬丈照我七尺形我喜不能寐  
起坐塵夢醒涼颼吹華髮霜髦被長纓登高發清嘯萬  
壑虛泠泠長天淨如洗滿座人皆驚清虛異人境蕭爽  
真蓬瀛胡為生塵土汨沒勞經營安得齊雲梯獨步遊  
黃庭瓊樓恣觀覽呼吸瑤華精吟詠玩佳景千秋遺世  
情

幅巾杖屨晚遊南北山間興賦

南峰翠凝黛北巘青堆藍橫空青翠色照眼覆玉環我

我金芙蓉迴出兩嶼間層巒挺奇秀恠石蹲堅頑孤高  
處士容窈窕佳人顏處士氣節剛佳人體態閑堯峇幾  
千尺絕頂難躋攀俯視衆山小下列臣妄班尊重朝諸  
侯峻險服百蠻檜栢崇崗巔蓀芷淺澗灣松風度長林  
玉珮鳴珊珊寒泉漱石齒琴瑟聲潺潺下有猿猱飛上  
有雲往還老翁居其中霜眉鬢爛斑野服白接羅絲條  
青玉環林泉日徜徉杖策時盤桓幽尋樂有餘清賞興  
不慳壺觴雜尊俎談笑生餘懽游心天地外無復思塵

寢寧憂宦海深豈畏世路艱風林塵慮空雲榻詩夢殘  
起視萬松頂素月流寒山

夢中役

夢中亦役役醒後愈囂囂囂囂更役役暮暮還朝朝奔  
馳天地老汨沒歲月消貧賤安吾常不泰復不驕峰頂  
絕消流海底無炎燭崇崗不受浸洪濤揆容燒變化乃  
浮雲喧轟實狂潮滄海豈加深青山靡增高人生本有  
性益損無纖毫胡為百年間綠鬢成霜髦區區聲利場



秋風吹征袍迅速驚烏兔攀緣愧猿猱塵韁日縈絆勢  
焰時煎熬行將脫塵俗富貴輕鴻毛聳身烟雲端矯首  
謝俊豪

江南懷古

仗劍出西遊來遊帝王州登高望故國感慨彈瑩篴長  
歌四五發雲物慘不收歌聲忽悲壯江漢不敢流我我  
天目山王氣今已收英主從北來長驅勢莫留浮雲捲  
旌旗天兵動戈矛國破佳人死時危志士憂遂令歌舞

金匱要略卷一  
地夜雨鳴松楸野殿莓苔古荒城烏鼠秋茫茫古帝魂  
千古不可求神飛故宮遠月出西陵幽淒涼白雲鄉寂  
寞芳草洲我欲弔古跡落日寒飈飈無言一尊酒悲風  
起閑愁

古意三首

我本山中人不為世網牽寓情猿鶴間寄興鷗鷺邊掃  
花淨石徑烹茶汲溪泉神遊三洞雲耳洗千尺淵兩手  
弄明月雙腳踏散烟胡為塵埃中脫屣未斷緣動有饑

渴憂幸無勢利纏何當駕天風飛上青峰巔聳身天地  
外凝心混沌先俯首謝人世一笑千千年

堂堂七尺軀處此人間世秋月與春花讌賞長游戲杯  
酒屢勸斟拚飲寧辭醉焉能百年中遽作千載計俯仰  
天地寬久客不知愧安得生羽翰嘯入烟霞去從茲億  
萬古瀟洒風塵外

夷齊偕盜跖耳目畧相類樗櫟雜椅桐枝葉良不異薰  
猶稍有姝妍醜從此始鳬短鶴翎長諒不殊此理得失

了莫齊一笑天地裏

我出何所適

我出何所適行吟對清暉著我烟霞屐製我芙蓉衣天  
風扶瘦策山雲鎖幽扉下同麋鹿遊上與猿鶴飛小草  
陳野色幽花發餘輝無一不自得深愧疇昔非嗟彼世  
網中對面觸禍機樽俎潛鴆毒笑談雜嘲譏甘心陷危  
辱疇能察先幾世緣吾已斷世好吾已微惟有金華峰  
相看不曾違榮華雖足貴林泉不如歸去去不復返永

食南山薇

我家壯山下

我家壯山下脫冠解塵襟  
古屋三五間秋風白雲深  
功名不掛口豈受歲月侵  
青山長在眼白髮任滿簪  
有酒可以斟有詩可以吟  
野禽可當曲澗水可當琴  
醉行無雅態狂歌有餘音  
逍遙黃葉徑蕭散清風林  
涼飈吹我鬢涼月洗我心  
風靜月不留我心無古今

題唐子華春雲出谷圖

雲住山色佳雲去山骨瘦雲物屢變更青山但如舊子  
華亦何人胸有山水痕差我萬疊青收拾在尺素春雲  
去何之出谷漸彌布滄鬱復氤氲天下期蓋覆或然化  
甘霖江山起烟霧枯槁及林木巨細沾雨露慎勿謾遮  
天掩蔽激衆怒無心我亦雲偶出非有故讀書幸不多  
早被儒冠誤巍然抗高節要與雲同步得失費卷舒坐  
閱歲月度富貴情易圖不義愧攀附負郭二頃田自足  
慰衰暮慙慙送雲出我欲尋歸路

挽琳荊山上人

大德庚子春生我及此公同庚復同道同遊金芙蓉窮  
途事多違志願始不同公葺芰荷衣長嘯栖丹峰賦詩  
雜風騷屈宋或可宗字畫尤俊健下筆儕王鍾顛張與  
醉素豈敢稱書工從容笑語間已足驚兒童況負此二  
長儘可開盲聾奈何知者寡栖栖嘆無逢我抱七尺軀  
混迹塵埃中開口談世事吐氣如長虹性僻多忤物世  
俗似不容拂衣青山下浩歌樂無窮長琴彈夜月短笛

吹天風無可無不可豈復憂窮通公今已下世年壽胡  
不豐我老天地裡歸然成一翁平生襪線才愧乏補報  
功同生不同歸又復異始終出處了莫齊嘆息天宇空

題松雲齋十五韻

青松如舞蛟白雲如游龍龍游化甘雨與世為年豐蛟  
舞散清影利爪擎高穹二者無限奇盡入幽人宮幽人  
室懸磬隱約松雲中松秀悅耳目雲生盪心胸讀書坐  
雲石鼓琴雜松風無往不自得深喜世慮空披雲採松



花何啻食萬鍾萬鍾食有盡松花味無窮松雲幸無恙  
天地同始終扶筇一相顧摩雲撫孤松問松幾何年適  
與雲會同松靜了不言雲去尋無踪回首萬峯頂但見  
山重重

丙申六月十六日軍亂奚德基賦詩紀事張純  
誠袖其詩來求和用韻述闕云張九四據蘇  
州發兵五百人赴杭省軍遂反襲

干戈久不息百苦無一樂縣官急徵需貧富悉籠絡西

州正擊賊空拳日相搏賊馬當道馳賊舟沿海泊盜賊  
固梟張官軍愈鷹掠征討五六年賊勢未便削朝憂萬  
甌空暮嘆衣袖薄點軍五百輩顧望累退却太倉萬斛  
粟食爾欲深托餘粒猶在咽吐之若糟粕返旆擬攻城  
長刀忍相著傷心百姓財剝奪人已索朝廷養此曹不  
啻如巨膊如何負國恩幸然尋就縛老夫鐵石腸見此  
淚迸落形容為枯槁肌膚倍蕭索深悲世事非屢日情  
懷惡皇天未厭亂旱魃尤肆虐不雨逾半年何由增廩

繫天道既靡常人心益惶霍民食轉艱難軍儲盡圖度  
終朝僅一餐無力太儉約雖免死甲兵猶恐填溝壑丈  
夫幸聽之未用遽驚愕牧守任龔黃將帥命李郭牧布  
撫字恩將展經濟畧天下不日清陰霾散寥廓

同前題下字韻二首

叛軍日驕橫六月反城下長竿揭旌旗羣凶列行伍蘭  
江接金華膏血腥草莽老弱皆竄亡奔馳實勞苦崎嶇  
扶父翁艱難負兒女萬死獲一生行李何暇取饑餓復

驚惶逢人語無緒數里絕行踪孤村盡禾黍亂後始得  
歸飄零如逆旅蒼烟銷荆扉青苔封石礎多謝故山雲  
護我彈琴所

兵驕亂紀律蕩然無上下雖之噲等才恥與噲等伍江  
南久喪亂州郡俱榛莽況復此輩反黎庶不勝苦拮囊  
索金銀殺人掠子女元惡幸誅擒所失寧復取治亂如  
理絲不理將失緒治田當去蠹不去終害黍軍容欲不  
驚必先肅其旅梁棟欲不傾必先正其礎措置果合宜

何憂不得所

題王秉彛樂善堂

結廬在人世惟善以自將宅茲幽迴地遠彼勢利場古  
屋三四間秋風白雲鄉仁慈居壺奧禮義為垣牆庭種  
三古槐門栽五垂楊芝蘭香四座花蓋映兩廂光輝謝  
金碧調節辭鉛黃吟榻青峰邊釣石綠沼旁牕前書萬  
卷膝上琴一張客至亦不惡茗碗與酒觴客去但高卧  
不夢封侯王全無寵辱驚常有聲名香胸中萬念空併

此身世忘祗存金石心靡替剛毅腸平生無所短而亦  
無所長平生不作惡善亦無可揚善惡俱兩遣長短未  
用量傍人患不足我樂殊未央樂此山水麗樂此松桂  
芳樂此烟霞古樂此風月良邱園之勝概泉石之膏肓  
豈止樂吾廬更樂斯民康古今之遺範天地之大綱無  
一不自樂其樂匪泛常其樂善無盡聊以名此堂

聽泉亭

枕石聽山泉看雲度流水水去動雲根泉鳴漱石齒神

清萬竅風夢破孤舟雨彷彿中郎琴泠泠響焦尾中含  
太古音分明合宮徵我老兩耳聾無心論臧否世事不  
願聞高卧茅屋底今朝偶聽泉爽氣侵骨髓毛髮為洒  
浙肝膽忽磊砢取泉三咽之頓失平生鄙翩然欲憑虛  
乘風學輕舉豈意下劣資悟此清淨理喜極竟忘言徐  
徐與泉語慎勿戀空岩寒烟鎖秋渚慎勿伴高人幽賞  
無窮已旦夕赴瀛洲奔馳日千里長空捲雪濤聲撼天  
地裡潜蛟既出遊蒼龍亦驚起恩波萬丈長大洗人間

滓豈獨此亭中但滌巢由耳

男兒生明世

男兒生明世學禮仍學詩禮以知揖讓詩可知盛衰上  
輔明主聖下救斯民愚坐食萬鍾祿出駕駟馬車否則  
居巖邱高卧秋風廬談笑理蓑笠獨釣西江魚

戊申歲閏中清賞十景

秋江明月艇

秋江明月艇月皎光婢娟老我坐其中蒼顏髮皓然半



醉美明月赤脚扣兩舷秋風百尺絲獨釣千丈淵不繫  
吞舟魚寧掣橫海鱣釣斷人間心不為世網牽鼓棹笑  
歸去月落江底懸

烟岫夕陽鐘

烟岫夕陽鐘清聲滿寰宇直催海月上山雲亦飛舉老  
僧定裡回英雄夢中起掃空聲利情洗淨塵垢耳平生  
剛毅腸聞之屢驚喜踈狂發長嘯起舞不得已遺音尚  
悠然迴入霄漢裏

麗圓橫長笛

麗圓橫長笛秋風感慨聲一吹山石裂三弄波濤紫江  
空翠蛟泣夜靜蒼龍鳴鶴怨雲巢冷猿啼月嶺明嫠婦  
悲秋淚孤臣去國情遺音尤激烈高調轉淒清曲終情  
未盡目送數峯青

修林策短筇

修林策短筇路入烟霞去羣峯喜逢迎向人如嫵媚攀  
條覽芙蓉臨流採蓀蒨幽花不知名馨香雜芳樹天風

吹敝袍曉露沾行履更無塵染衣常有雲生袂山禽忽  
飛來啼破幽絕處

籬邊食落菊

籬邊食落菊采采黃金英拾之不滿掬松露相和傾三  
咽清肺腑九竅皆芳馨食之久住世化為天地精不饑  
復不老顏貌如童嬰驟驚訪安期跨鶴尋廣成回首謝  
人世何用千秋名

嶺上撫孤松

嶺上撫孤松松陰蓋天地霜皮四十圍傲睨人間世老  
幹帶烟霞虬枝撼風雨玄鶴數往還白雲互來去撫松  
一問之坐閱幾千歲人壽能幾何松老良未易與松語  
未終落月寒生袂

開徑延馴鶴

開徑延馴鶴愛此癯瘦形不與凡鳥伍戛然獨長鳴我  
性鶴相似寵辱常不驚平生寡交游閉戶鮮送迎松關  
夜月孤茅屋秋霜清從今與鶴遊騎鶴朝王京鶴爾幸

知此慎勿輕渝盟

登樓數去鴻

登樓數去鴻  
目斷江山異  
帛書望不來  
愁殺深閨女  
遺音墮寒空  
疎影澄秋水  
淒涼關隴雲  
慘澹瀟湘雨  
飛鳴萬里餘  
為此稻梁計  
點點夕陽中  
陣陣荒烟外  
天際兩三行  
飛入蘆花去

朗吟黃葉寺

朗吟黃葉寺  
落日長林密  
天花拂衣香  
露草沾屣濕  
深深



烟銷竒峯閑雲叢危石金鐘透太清玉磬穿虛碧境勝  
龍象游夜靜虎狼出地遠人踪稀心定塵緣寂仙凡迴  
不同坐久三嘆息

長嘯白雲峯

長嘯白雲峰聲清方夜永海月忽飛來光照千巖靜松  
林奏瑤琴山泉漱金井下與人世違上接星辰近涼露  
洗心源天風吹鬚影使我凡陋軀泠然發深省願言生  
羽翰直上青雲頂

採蓮歌

畫舫綠楊邊  
吳娃競採蓮  
紅粧映綠水  
窈窕誇少年  
只愁蓮心苦  
食之味不甜  
只愁藕絲短  
織之難成緜  
相與唱歌去  
撐破蒼波烟

讀書山月下

讀書山月下  
月色流巖扉  
松風吹毛髮  
草露沾裳衣  
研精探玄奧  
竭思窮幽微  
興亡空感慨  
今古誰是非  
孔孟幾千載  
斯文愈光輝  
蚩蚩愚下士  
去此將安歸

舉酒春風前

舉酒春風前勿訝衰顏紅藉茲麴蘖媒成彼醞釀功  
使鐵石腸化為歡悅容喜色浮鬚眉和氣填心胸浩浩  
六合間廣扇淳厚風兒女豈知此唯醉芳花叢

圍棋白日靜

圍棋白日靜舉袖清風吹神機衆未識妙著時出奇  
我老天宇內白雪凝鬚眉坐閱幾輪贏歷觀迭興衰古今  
豪傑輩謀畧正類棋局終一大笑驚起山雲飛



舞劍清夜闌

舞劍清夜闌孤燈耿中堂一舞空奸邪再舞摧豪強頻  
起為君舞月出雲飛揚氣衝牛斗暗影動蛟龍翔悲風  
轉蕭颯壯志彌慨慷時哉不我逢石匣深韜藏

吹簫明月底

吹簫明月底素魄流寒光簫聲更清婉音調美且長孤  
鸞舞天風老鳳鳴朝陽仙人王子喬往事空茫茫丹成  
竈應冷仙去臺亦荒千秋更萬古日夕遙相望

撫琴白雲端

撫琴白雲端聲透巖谷裡山空夜未央  
長天色如洗喧啾百鳥吟蕭瑟孤舟雨  
萬壑鳴松風千江瀉流水森嚴肅鬼神  
恩怨訴兒女世不爾聞唯入巢由耳

漁父曲

雨過暮雲收江空涼月出輕蓑獨釣翁  
一曲秋風笛宿鷺忽驚飛點破烟波碧

對奕青松邊

對奕青松邊松雲濕荷裳棋中有深機淺識未易量知  
進貴知退能弱還能強爭先合顧後得勝當慮亡輕剽  
或易失遲重終寡殃將卒勿驕惰士馬須精良能以此  
衆戰柔者必至剛

對酒舞長劍

對酒舞長劍劍舞影更長始舞飲一斗迭舞累百觴舞  
之不能已飲亦未易量長舞影傒傒長醉志揚揚尚不  
論公孫况復數項莊年深劍文在曾斬樓蘭王舞罷醉

未醒落月流寒光

和萬卷閣詩韻

倪希聖攜石元吉題萬卷閣詩見示且言其先大父  
樞密公南渡後嘗讀書遊觀於此南渡去今二百年  
遂成陳迹感古傷今不能忘懷何時一登樓縱觀前  
人遺蹟朗吟豪詠于天風百尺之上與王粲元龍相  
望于千載之下顧不偉歟因次韻二章

天風百尺樓壯制凌霄漢繞屋山四圍充棟書萬卷峰

巖獻奇觀宇宙鍾神美絃歌師魯丘政治資姬旦冥搜  
竟忘疲幽討庸辭倦唯知扇文風未必圖美宦桂月與  
松雲時復供清玩人去樓亦空千秋發悲嘆

畫棟麗晴霞飛甍接天漢虛櫺納青山巍軒貯黃卷緬  
懷瓶樓人胸襟蘊奇美相去數百年坐閱成一旦想當  
讀書日研精固忘倦浮雲變盛時短世驚薄宦我欲登  
斯樓烟雲聊把翫感慨三撫闌臨風寄長嘆

雨中懷李本存十二韻

久雨不出門幽齋抱岑寂點檢屋外山白雲為雨濕最  
苦溪水添沒却釣魚石平生慮事深無故憂得失因念  
倦遊人荒涼不溫席獨抱瑰奇才雙瞳黑如漆關山一  
萬里誰能共欣戚故舊半彫零親戚隔存歿亂後幸自  
强感激彌嘆息蒼笠擬訪之濁酒聊共適酒酣彈缺歌  
忘情話疇昔雲深路不通何處尋踪跡

幽齋清興

牕迎青嶂遠門掩白雲深坐久風生席年高雪滿簪訪

梅臨水際採藥陟烟岑月往桓伊笛秋庭單父琴驚醒  
塵土夢滌盡利名心銜世閑聲譽生平不用尋

故園梅花

身世水雲鄉冰肌玉色裳靈均千載恨和靖一生忙南  
國遺高躅東風遞暗香久同松柏搽肯學杏桃粧冷淡  
孤山月高寒半夜霜鶴猿常款狎蜂蝶任猖狂

興懷

幽遯足嘉謨崇勲授壯夫杖藜登嶺岫蓑笠釣江湖最

喜烟霞古從教姓字無頓忘身外慮寧受世間譽盡日  
尋棋局長年卧酒壚飲酣吟嘯遠睡醒興懷孤秋嶼翔  
雲鶴春波浴海鳬四時花木美野叟復何圖

東籬丙辰季秋作

曳杖東籬下層巒列環岫南山如有情青翠俯相就松  
桂二老蒼烟霏乍無有孤雲屢出奇羣峰競呈秀圖彩  
寫晴嵐琴音漱寒溜采采黃金英芳香滿衣袖

新月



新月如佳人娉婷特姝麗雲端露蛾眉丰標迥然異輝  
彩雖未盈已足破昏翳但願早團圓神光耀寰宇從茲  
億萬年長照人間世

秋懷次童中州韻四首

拭目看秋雲洗耳聽秋雨晴刈東皋未冷衣南山苧長  
安名利途屏跡不吾與惟有金華峰相看澹無語

長空好明月燦爛今夕晴萬里皆月色四顧無人聲徘徊  
下青松照我茅屋明我望長嘆息悠然萬感生取杯

挹青光和此松露傾嚙之清肺腑快我平生情

沈郎江左人聲名驚宇宙秋風百尺樓寄傲腰圍瘦惜  
哉清廟器未展經綸手斯道日已亡斯人焉可友唯應  
雙溪月清光屢相就

桂魄延秋景松飈生夕涼良宵兩相值蕭瑟流清光風  
聲驚客鬢月影照我床徬徨不成寐轉覺歲月長起坐  
問風月而我誰老蒼風靜月不言耿耿天中央

三月望夕玩月

長空蟾吐魄良夜何團團皎如青銅鏡燦比白玉盤試  
浴海波底飛上青楓端徘徊嵩岱間宇宙生清寒神光  
常不泯留作千載看

南山晚眺

南山青如藍處士衣可染獨立萬仞崗眼空天地遠扶  
筇訪梅竹褰裳躡苔蘚靜聽水潺湲卧看雲舒卷長嘯  
撫孤松乘閑數竒巘平生不動心肯隨名利轉摩挲太  
古石相知諒非淺

古意

濁醪有佳趣不結醒者歡  
素琴有奇指不為俗耳彈  
真樂存妙理流水環高山  
知味諒不多知音良獨難

樵雲獨唱卷一

欽定四庫全書

樵雲獨唱卷二

元 葉顥 撰

古詩

浙江潮

浙江潮從海門起  
濺沫飛流幾千里  
老龍奮拔滄海波  
六丁怒決天河水  
萬馬奔馳人盡驚  
千夫賈勇衆莫禦  
滔天濁浪排空來  
翻江倒海山為摧  
固知神物善幻善  
變化不然胡為若  
此之壯哉  
狂風瀕洞響  
天籟長空隱

約轟春雷衝堤激岸勢雄偉春崖噉石聲喧阗更秦歷  
漢逮唐宋潮生潮落來往時時回上浮銀漢蕩瑤浦洶  
洶危瀾鋪練組江神河伯盡出游素車白馬尤雄武海  
若載驚旌馮夷擊鼉鼓龜蛇躍長蛟舞人言子胥怒未  
消怒氣突兀干青霄吁咽吐霧如山高咆哮呼叱聲愈  
囂震驚溟渤鳴洪寥直吞吳楚志意驕於戲三綱五常  
自古有至今禮法千載之下明如日月之昭昭君實有  
臣而殺奚怨號員兮忠義非兒曹豈不知此無君之罪

將焉逃少焉風定洪濤靜似聞予言發深省水天上下  
玉無瑕月白江空銀萬頃

錢塘懷古

君不見古錢王錢王在時民阜康不侈不僭能安邦五  
季喪亂人相戕鄰國雖斃吾無傷錢王去後兒孫良致  
身能弱還能強手持版籍歸宋皇富貴不失福祿昌民  
受其惠壽命長人懷其德久不忘千載之下有耿光至  
今號稱國不忘又不見子瞻作郡臨安時風俗淳厚民

雍熙春光淡蕩花柳靜凝香燕坐簾幙垂耕田而食鑿  
井飲公家作勞民不知西湖種藕不種穀朝昏十里香  
風吹酒邊談笑白日永賓朋滿座咸賦詩風流一代孔  
文舉下眎山濤阮籍沈湎之輩皆小兒子瞻去後景物  
非風俗彫弊世運衰我來曳杖訪遺跡荒烟衰草空離  
離湖山風月只如舊昔人不見今人悲秋風滿目立良  
久但見斷雲斜日猶照蘇公堤古今何物能長久前代  
英豪竟安有文章霸業墮渺茫唯有聲名傳不朽是非



榮辱過眼空萬事何如一杯酒

雲顥山人紙衾吟

楮柏霜華細藍田玉色鮮全無針線迹寧費綺羅錢照  
席凝冰潔鋪床奪錦妍卷舒皆自在表裏出天然瑩徹  
明無滓溫柔軟勝綿姜公聞必喜杜甫見還憐素質誠  
無讓紅塵已斷緣銀屏非等伍石枕慣周旋野客深相  
結豪家定棄捐不勞寒女織唯稱老夫眠光彩生虛白  
真純絕外鉛陽生春浩浩暖快腹便便蓋覆功非淺清

虛理不偏致身天地外迴出羲皇前睡去山雲熱情空  
海月圓梅花頻入夢香影繞林泉瓊姬亦垂顧丰姿美  
嬋娟邀我登廣庭恍惚游鈞天天風雜環珮上謁瑤華  
仙遺我不死藥授我長生篇使我顏色好犀齒還榴編  
蒼容返朱唇綠鬢垂華顛方瞳復如漆碧沼浮疎蓮從  
茲久住世游戲三千年我聞而喜忽驚寤但見清虛滿  
室月白雲翩翩

八月望夕翫月歌

八月望夕天大晴纖埃散去河漢清長空皎潔淨如洗  
四顧寥閨秋無聲少焉皓月生滄溟吳牛乍見喘且驚  
連宵陰晦不見月今夜見月倍稱情寒芒直射斗牛窟  
滿庭冰雪銀水晶低徊弄色茅屋上照我慷慨平生誠  
乾坤虛廓照萬古再一萬古光愈明從茲高照萬萬古  
毫髮可容無遁形老翁今年七十一固當與月同虧盈  
月能燭幽鑒下土人能撥亂至太平二俱有功于天下  
皆足為世之重輕故能發無盡之幽光垂不朽之令名

雲霄有路通蓬瀛仙人相邀遊廣庭朗然晃耀白玉京  
鈞天樂奏聲鏗鉤風吹衣袂虛泠泠環珮錯雜相和鳴  
團團古銅鏡燦爛天之庭清輝百千丈神彩何瑩瑩金  
波瀉瓊液躍出蝦蟆精雲邊白兔知幾齡玉杵春香藥  
未成丹桂不老常芳榮西風涼夜秋花馨姮娥孀居誰  
與伍美質不眠長獨醒貝宮曠濶寧有極舉步欲進足  
屢停滿身風露良久立依然命駕還青冥黃塵白水三  
山遠魂夢飄飄迴翠輦恍疑身在紫霞峰影隨大地山

河轉霓裳羽衣不復道靈丹難駐容長好君不見萬里  
關山全盛時有道君王蜀中老

吾琴所為曹令所壞寓居賦秋風破屋歌

君不見南山叟一室容身小如斗閉門僵卧學袁安雪  
打風吹懶開口又不見牛馬走短布單衣寒露肘長途  
汨沒笑李斯咸陽市上牽黃狗男兒壯志要似渭川雲  
夢竹不染塵埃出林麓又似蒼顏勁節松偃蹇孤高立  
岩谷雪中矯矯舞游龍霜裡消消濯寒玉春和長有拂

雲青歲寒豈減昂霄綠野人曠蕩無所歸居無華屋膳  
無肉胸涵膽氣欲食牛世乏才能恥干祿高眼不復夢  
功名信步何曾限南北行藏無碍獨縱橫動靜隨緣少  
拘束從來任運合天真坦率人皆笑粗俗儒生性僻不入  
時身老乾坤忘寵辱囊虛買譽百兩金日糴充饑五  
升粟頑然空洞腰十圍唯貯文章滿斯腹謾開電目燭  
五行徒援霜毫寫千幅祇聞張奉賤毛生未見夷吾憐  
鮑叔短琴一弄固有餘長缺三彈常不足噫戲安得樂

天都蓋洛陽城裡萬丈之白裘杜陵大庇天下寒士萬  
間之廣屋尊賢重道貽今羞大廈寬袍遂吾欲床頭更  
有酒新熟綠蟻濡唇斟百斛此時不願萬戶侯何心更  
作九州牧山中宰相樂餘年管領邱園慰幽獨雲邊吟  
咏足逍遙月下壺觴倍清淑閑鋪棋局伴爐薰滿吸湖  
光飲山渌含烟細草疊芳茵過雨餘花呈繡褥王侯卿  
相非我儔牧圉樵漁是予屬四時佳景盡來歸泉石烟  
霞皆素蓄笑拖長袖醉春風寄傲軒牕百斯福

山中遊

木翳兮林深境幽兮徑平峰高兮月小澗古兮泉清霧  
氤氲兮圖形水颼颼兮琴聲春欲暮兮鳥啼花落秋將  
至兮鶴唳猿鳴膏吾車兮整吾駕將有事兮林垞爰發  
爰啟載興載征訪仙人兮琳宮扣釋子之玄扃高揖浮  
邱遠邀廣成拾丹田之瑤草採翠巘之瓊英掘棲烟之  
枸杞斲含露之猪苓駐予顏兮長春延予年兮遐齡與  
日月兮同光偕天地兮不傾蔽明兮掩聰凝神兮齋精



心清兮欲寡體安兮氣寧絕交息遊罷送休迎不記晦  
朔寧知虧盈不事王侯寧識公卿雖乏鍾鼎之貴終無  
鈇鉞之刑塵韁莫繫世網曷縈得失一致寵辱不驚何  
必論泰山之重鴻毛之輕麻衣之賤金章之榮又何必  
計蠅頭微利蝸角虛名長途擾擾鬧市營營蹈草廬之  
高躅誦陋室之佳銘土床石枕霧帳雲屏依稀和靖仿  
彿淵明玩庭梅之冷艷嗅籬菊之秋馨聽鶯鶯之求友  
呼鷗鷺以完盟展奇松之軒蓋鋪軟草之氍毹臨清流

分洗耳汲滄浪兮濯纓躬耕幽嶼獨釣荒汀酒船茶竈  
詩卷棋枰樵漁賓客牧圉弟兄更唱迭和極論深評雲  
邊橫笛月下吹笙隨心去住任性縱橫緬思疇昔慶快  
平生襟懷洒落胸次崢嶸逍遙邱壑放浪身形悠然遺  
世脫爾忘情迴視彼抗塵走俗之輩蜂房課蜜之功甚  
時可辦蟻穴封侯之夢何日能醒亦何異於填海之精  
衛良可悲夫燒空之火螢

北山遊

北山山色青更青堆藍積翠開畫屏浮生突兀百千丈  
駕梁峙石勞六丁自從太極既判混沌死天開地闢知  
幾齡東西橫亘一萬里遠迎岱嶽連滄溟晨昏礙日遮  
月星往往不雨轟雷霆荒烟霾霧虎豹隱深淵大澤龍  
蛇腥幽花野草不識名天風時送芳樹馨風雲變態皆  
可玩烟光嵐影浮虛櫺有如佳人在空谷體貌閑冶尤  
娉婷人間歲月不復記祇隨寒燠觀堯堯神仙宮殿梵  
王宅螭藏鳳隱凌青冥金鐘玉磬問遠近洞門無人長

不局道士昔誦藥珠經功成騎鵲朝帝廷腰懸環珮雜  
宮徵鈞天音樂風泠泠邇來歷世經累劫丹書寶篆猶  
鵠銘摩挲石刻一慷慨頓覺胸次洗空世慮塵夢醒彈  
琴坐盤石遺音繞指穿林垆山靈鼓舞山鬼嘯常有白  
鶴飛來聽湘妃漢女亦遊玩載以霧縠乘雲輶登高採  
妙藥長鏡短鑷鉏茯苓天瓢瀉石髓瑤杯斟醪醕飲之  
似欲生羽翎神清氣定百脈寧下視人寰烏兔急東生  
西沒何時停尋名訪利浪自苦便欲脫去世俗凡陋無

用七尺之軀形遊行無碍少羈束化為天壤之內不老  
不死千秋萬古英爽之精靈

登九龍山訪孝標遺跡月下飲酒

杖藜扶我登九龍輕鞋短袂隨天風九龍飛去幾千載  
雲閑松老青山空孝標先生骨應朽清名與山同始終  
荒烟衰草迷古洞唯有皎皎栖清楓酒邊半醉弄明月  
月光忽落杯酒中舉杯歡笑和月吸清光散入胷次照  
我突兀礪魄之孤衷平生所蘊剛毅氣洞然明白無隱

容信知古人嗜好不在酒愛其果能助發英銳之志醞  
釀麴蘖之奇功興懷不盡下山去明月又在天南東

中秋懷古玩月

空明仙人遊廣寒挾予飛入青雲端罡風吹上九萬里  
冰輪直駕穩更安碧天空濶高而寬巍巍金闕非人間  
瓊樓紺宇開萬戶水晶宮殿銀闌干團圓青銅鏡燦爛  
白玉盤寒芒曜今昔素液流肺腑肝滿身風露毛髮爽一  
衿冰雪衣袂單雲邊有女騎綵鸞清歌妙舞美且閑笙

簫迭奏音調古二十五絲錯雜彈姮娥遺我長生丹服  
餌久久生羽翰朱唇綠鬢顏色好骨剛體健力不殫慙  
懃再拜謝明月清光留作千載觀

東鄰叟歌

君莫羨東鄰叟囊貯黃金動盈斗粉白黛綠眩目前十  
二金釵圍座右袖中曲譜貴新奇五典三墳不知有往  
來冠蓋盡英豪駿馬金鞍結良友天公未必長爾私有  
限歡娛豈能久華堂歛忽變荒坵落日牛羊亂馳走羨

君莫笑西家翁身長七尺眉頰豐閉門不肯學干謁半  
世不識王與公無心去較蠅頭利有口懶談麟閣功茅  
屋頽垣常漏月麻衣短袂不蔽風儲乏陳紅之五斗心  
有至赤之孤忠對客張眉唯說理向人捫腹肯語窮胸  
中豪氣千丈虹壯志不下陳元龍百年富貴如飄蓬是  
非榮辱轉眼空珊瑚數尺壯安庸季倫愚痴真駭童夢  
回金谷春已去欲尋往事俱無蹤但見荒烟衰草寂寞  
棲春紅繁花散亂歌舞歇行人撫掌笑石崇首陽山人



恨不逢食薇不飽樂在中至今姓字不磨滅皎如白月  
懸高穹但見天地之內光輝照耀南北連西東清風遐  
播億萬古而我無盡物有終俯視沈酣聲利輩空中短  
歛風裡蟲

第一人間快活凡歌贈芙蓉峰蓑衣閑道人貫  
酸齋號雲石仕至翰林學士休官辭祿或隱  
屠沽或侶樵牧人莫測其機嘗於臨安開市  
中立牌額貨賣第一人間快活凡人有買者

展兩手一大笑示之領其意者亦笑而去

芙蓉仙人冰玉質貌粹骨剛長八尺闊過塵寰擾擾人  
玄鬢朱唇雙眼碧利名場裡寡交游勢要途中絕蹤跡  
世誇豪富尚榮辱信手拈來笑輕擲留得人間快活丸  
行住之間常服食平生顛沛藉扶持什襲珍藏深護惜  
吞不得吐不得快活滿懷言不及十分瑩潔滅瑕疵一  
味無求甚奇特香通九竅達四肢淨若明珠赤如日解  
歇馳求嗜欲狂能除奔競貪婪疾非辛非辣復非酸不

苦不甜還不澁天然風韵妙無倫不讓醍醐寧數蜜食  
之氣定百脈寧肌肉豐腴美顏色融和春意動鬚眉體  
健身強百斯力等閑愈嚼味愈嘉肪白膚黃炙逾出時  
時拈弄與人看驚起凡愚耀今昔擬將斯藥壽斯民低  
價無人肯酬直風月笛烟霞履綠蓑衣青箬笠五湖四  
海足徜徉萬水千山恣游歷邇來歸卧白雲巔悔跡韜  
光那尋覓雲封讀易臺澗逸彈琴室遠岫正堪觀纖埃  
焉敢入採山釣水拾松花千載清風有何極衣袂飄飄

翠袖寒直上金杯峰頂立飲我紫霞卮坐我蒼苔石說  
盡萬事非驚嘆羣迷癖嵐氣潤冠裳山光浮座席踢翻  
煮藥爐砍破長生術洞門無人常不扃開盡碧桃春寂  
寂長安車馬任喧阗人說公卿都不識

樵雲老人獨唱歌

樵雲老人年七十髮白雙瞳黑如漆喜唱人間快活歌  
好吹酒後無聲笛一聲吹動嶺上白雲飛一聲吹動山  
巔明月出驚醒松梢野鶴棲喚起波心海蛟蟄老來湖

海友朋稀貌古形哀無氣力盡日踈齋坦腹眠五斗濁  
醪時自適常遊北墅劇歡娛每對南山抱岑寂張三李  
四懶結交黃八趙二不相識自歌自舞興懷真獨步獨  
行神思逸家無生產萬鎰金囊蓄樵雲獨唱集杜撰八  
陽經何止三千帙醉墨淋漓不整齊粗言跌宕唯真率  
丈夫志氣脫情塵却媼嬌羞貴粧飾長蛇出穴衆盡驚  
駿馬下坡人辟易瀑岩溜斷峽泉飛茶鼎濤翻海波溢  
光寒孕出蚌腹珠聲雄擊碎鴻門壁千尋檜柏秀奇峰

一片莓苔裊頑石祇圖豪放肯趣高肯蹈凡庸陳腐失  
曹劉沈謝丈人行江左風流亦勑敵自愧滕薛微敢與  
齊晉匹雖乏經邦辭頗盡歸耕術洗淨功名疵滌空聲  
利疾星斗燦心胸烟霞生肘腋玉潤奏瑤琴銀河瀉瓊  
液松雲滿草衣岩霏洒石壁空翠撲晴軒虛白凝霄室  
豪端錦繡機奚藉天孫織語險神鬼愁言奇魑魅泣懦  
夫忽剛強義士彌感激山靈為起舞萬像咸拱立已免  
世俗羈猶負林泉癖飲酣拍手呼李白傾倒壺觴同座

席共話斯文喪亂後餘子碌碌焉足恤固多狗尾可續  
貂其奈羊皮殊豹質噫噓噓安得快剪刀剪取雲夢竹  
鬣毫束作筆刪削鄭衛淫剗除妖艷習幹回正始音書  
寫大雅什烜赫照乾坤焜耀當天日清風億萬年輝彩  
千百尺妙理造幽微芳馨著今昔虎嘯龍吟天地間蚓  
唱蠅鳴俱屏跡狂瀾捲盡江漢清陰霾散去山峯碧

註或

問予曰子何易易以詩言也檜柏秀奇喻詩之美固佳  
矣奈何以區區之頑石比之子何易易以詩言也予語  
之曰費千金之財不能分寸移之竭萬夫之力不能絲  
毫動之寒暑不能改其容冰霜不能變其節齊天地之

欽定四庫全書

卷二

十四

終始閱漢唐之盛衰遇狂瀾則為砥柱于中流而不傾  
處峻險則聳孤標于絕頂而不倚水不得而漂火不得  
而燬斧斤不能琢其質寵賚不能易其守巍然不急歸  
然常存置之渭水左右嚴灘南東傲睨青徑雄踞翠峰  
俯瞰長流仰揖喬松芝蘭園繞莓苔累封延浩月納清  
風麝鹿聚猿鶴從別有遺世高士脫塵異翁志氣高邁  
趣向雍容慕其高抗樂此幽樞衣讌坐策杖追隨彈  
琴鼓瑟飲酒賦詩朝夕悅賞頌刻弗違在肯豪傑之輩  
同坐狠石而談世事放達之士忘情醉石以消歲時英  
雄遺逸今不復見此名此石逾千載而靡墮予將高蹈  
遠引遙紹于諸老不識吾子以為何如于是  
客喜而笑揖予而退吾乃操觚引墨而書之

雲顥天民獨樂歌

雲顥天民身健武屈指今年七十五  
衰鬢凝霜暖不消



吟眸掣電明堪覩耳聾尚可聽簫韶舌在猶能話今古  
風標凜凜瘦如松意氣堂堂獍似虎生平快活不識愁  
祇有攢眉作詩苦得句狂呼笑點頭論文猛拍忙搔首  
栖林玄鶴為驚飛出岫白雲俄退走梅邊竹笛半醉吹  
石上桐琴一長撫飯後歡陪夜月遊飲酣喜對春風舞  
常呼晨霧鎖松扃遠引寒泉環竹戶因尋陸羽寫茶經  
閑訪陶潛抄菊譜人間俯仰計揔非目下恩榮樂寧久  
何如丘壑了餘生渴飲饑餐飽摩肚兒學躬耕僕飯牛

歸而斗酒謀諸婦客至從嗔不與言坐對容峰懶開口  
不將蹤跡出人前高眠月嶺烟霞塢已知身世足優游  
唯愧乾坤無報補呵呵呵真草莽收拾閑名莫辜負  
從教世俗罵痴狂任彼時人笑愚魯

採蓮曲四首

若耶溪頭同採蓮濃粧艷抹誇少年綠荷萬柄映碧水  
吳姬照影羞嬋娟一雙鴛鴦在芳渚見此躊躇空自憐  
去年送郎別江滸郎君上馬妾在船湖光歛艷香旖旎

酒味冷冽花鮮妍今年花謝香應老漫郎漫郎何當還  
吳江女娘冰玉肌薄抹膩粉厚抹脂蘭舟蕩漾翠波裡  
花間爛漫香風吹蓮心苦難食食之不療饑鵲絲短難  
織織之不成衣採蓮採蓮人未歸山長水遠歸何時

江上晚來新過雨亭亭芙蓉在綠水芳洲香霧雜紅雲  
蘭舟喜殺穠粧女年來年去世情空花落花開香十里  
今年歡笑復明年幾向花前共花語荷花顏色只如舊  
妾顏未必長嬌美只愁八月殞清霜吳中一夜秋風起

荷花嬌媚人共誇九洲三島蒸紅霞採蓮女郎十數輩  
唯有阿姨顏色嬌如花自從嫁後懶梳洗十年不見音  
信賒管取明年採蓮去撐船直過阿姨家

苦雨嘆

久雨未便晴昏烟翳穹昊出門泥濘步難行十步九折  
憂絕倒辭跡雜苔文侵堦風不掃由春至夏百餘朝雨  
脚如麻幾時了樂事賞心何暇論尺薪斗粟無從討縱  
有高車可出遊濕雲遮斷繁華道杜陵野老數吞聲床

床屋漏吟情惱山翁放達不識愁無端為爾傷懷抱南  
山豆亦荒北嶼松亦老東園欲語花西徑忘憂草笑臉  
嬌啼膩粉銷檀心懶吐芳香槁綠怨紅羞既寂寞蜂慵  
蝶困庸園遶千葩萬卉總消磨庭下決明顏色好何當  
散陰霾放出日曠曠麗景穠鮮萬國明晴光浩蕩千峰  
曉

梅友公遊芙蓉峰探神仙遺跡登高長嘯俯視  
塵世然後朗吟步月而歸自魏晉之下曹氏

父子桓溫庾亮之徒登高對月飲酒賦詩其  
後寂寥千年世無斯樂今公乃能以雅道繼  
之蓋庶幾馬予足不至此山幾年矣因公之

遊遂喚醒舊夢從道復出詩見示遂次韵焉

空山學仙子乘鸞烟霧濕夜深吹洞簫聲斷鳳凰泣佳  
人去後不歸來寒雲古路迷黃埃當年舊事摠陳迹回

首此意千古空崔嵬杉松弄影

闕

仙益玉宇寥寥浮爽

壇洞門無鎖畫不扃雲牕雪浪聲澎湃短世茫茫赴急

流功名悞我三十秋人間俯仰竟何補便欲對此乘虛  
舟登高探異物夢魂皆髣髴凜然心肺開肝膽忽突兀  
中有一人眉髮奇不言不笑看晴霏芙蓉為裳雲為衣三  
花樹下容巍巍隔水微茫相對久贈予靈芝飲予酒拍  
手相從入紫霞不覺麻衣濕寒溜忽然而去不復謦山  
雲叫斷無人聽是中誰讀黃庭經耳邊忽度琅琅聲醉  
筆題新詩戲拈爛墨澆淋漓西山紅日忽已失新月夜  
上橫蛾眉兩袖天風清九竅歸去恐為神鬼笑興懷不

盡下山來洞口巖花羞自照

謝陳國賓見寄

陳兄遺我山中詩隨風落空成珠璣寒光遠壁夜牕紫  
清聲響澗山泉飛杜陵去後天無功飄飄千古遺悲風  
老兔入雲霄漢黑大龍上天江海空知君筆有萬牛力  
追轉風騷氣無敵辭豈意遠欲乘虛天高風冷寒生骨  
作詩為謝來意勤自慚瓦缶無美音闌干一撫三嘆息  
天風西來洗予心



金華尉趙德夫祈雨有感

陽烏赫赫明高穹，火雲不雨天西東。  
晴波渴飲千丈虹，嘉穀槁死生蟲蟲。  
金華趙宰亦憫農，陳辭涕泣呼天公。  
食天之祿，因農功，視農不救，寧為忠下人無罪天所容。  
願為斯青歸微躬，志誠直通龍伯宮。  
須臾遣出雙玉龍，利爪排空怒且雄。  
阿香推車海若從，鞭雲駕雨隨天風。  
下與人世為年豐，要令饑旅顏回童。  
少焉雲散天宇空，神龍却歸潭水中。  
廟閑山空鼓鼕鼕。

謝李從道見寄

漢唐之世多俊賢才高有如橫海鱣搜索異景不得潛  
驪珠一夜飛上天江左風流亦可憐高談出口如湧泉  
近來諸子無足言白鷄夢破千千年斯文無人世所寃  
遣公出世扶其顛遨遊八極乘紫烟絳旂丹轂驅我先  
我生嗜酒無一錢酒酣落筆驚四筵見公始覺心茫然  
仰天大笑呼謫仙天風吹落雲錦篇皎如明月墮我前  
寒光耿耿江底懸魚龍夜抱星斗眠議論泓泓來百川

似欲上拍曹劉肩有人如此猶棄捐  
朱顏改後寧復妍  
願為義和執玉鞭  
駕馭白日青雲邊  
請公早上登封箋

題聽香亭梅花卷

山空木落彫繁卉  
政苦蠻烟愁瘴雨  
南枝此際特清奇  
獨抱孤真巖谷裡  
水鄉雲路寡相知  
惟友風姨交月姊  
江南歲晏淡粧束  
沙上無人薄梳洗  
丰姿瀟灑態度閑  
修竹疎籬茅屋底  
羅浮日冷水欲冰  
凍靄昏霾江路陰  
殘雪消遲霜魄出  
一梢寒彩明空林  
人知鼻鼻目善睹

豈知劫外春光淡蕩春意深平生不識宋廣平但識鐵  
石腸肚珠玉之胸襟平生不識桃與李奇松勁柏屹立  
千仞之雲岑唯許孤鸞雙鳳見豈容妬蝶狂蜂尋幽香  
旖旎薰宇宙芳流不盡古至今暮齡作事愧顛倒聽不  
以耳唯以心瑤琴三弄枯樹下摩挲老眼觀妙音西湖  
處士寧復道東坡先生骨應槁邇來八萬四千載只有  
梅花顏色好羌笛聲高舊夢醒玉樓人去東風香橫斜  
浮動未要論奇芬不在枝頭老

再賦聽香亭

并序

予既賦聽香亭梅花詩書於卷尾已而興懶神疲高  
卧雲樹之下夢美人玉容冰質風環雲珮揖予而言  
曰子之詩雖美矣何獨于聽香微旨之吟咏遂俾幽  
姿減艷雅態違歡公能不遺幸續賜題品使枯茲朽  
榦頓發奇芳幽谷寒巖倍增春色豈唯無負于梅花  
而不肖亦免以藉口伏惟司花之真宰不識吾子以  
為何如予乃劃然而寤即操觚洒墨復題一詩雖未

足驚羣聊以謝六橋公鳳爾

聽香亭畔春風起吹折瓊花三兩藥烟梢留宿白雲飛  
橫渡溪橋歸海嶼雪消南國近黃昏月照前村半江水  
五更霜重玉容寒吟翁睡足茅屋底夢中非我亦非梅  
非鼻非心復非耳但見芬芳遍太虛唯聆馥郁迴寰宇  
幽香和凍墮琴床旖旎肝腸熏骨髓胸次崢嶸妙莫窺  
襟懷洒落奇無比醉後頻驚往事空醒來倍覺吾廬美  
疎影橫斜澗沼中韶光浩蕩乾坤裡雌雄蜂浪自狂

山猿野鶴深相嗜畫角高酣興不孤玉簫婉婉情難已  
霧鑰江南去路迷羅浮望斷知何許擬祛聲跡絕閭塵  
汲引深情為君洗

畫竹王汝明為賦

永和年間王子猷月林吟嘯最風流禿錐渴飲三斗墨  
為寫琅玕萬項秋元祐年間文與可四絕聲名落江左  
渭川千畝在心胸噴飯滿案饒唾墮此君高蹈只如此  
二老遺踪成坎壈王生畫竹妙逼真清奇不愧前朝人

情空意定偶一掃坐令寒岩空谷回陽春我疑此子有  
神助不然何以得此胸次瑩潔不受纖埃侵孤標勁節  
冠古今霜容水彩勢百尋往往青鸞偕紫鳳飛來錯認  
舞且吟常訝涼飈生座右耳邊自聽蒼龍吼煩君留意  
重珍藏倘遇雲雷恐飛走

疎齋清樂

按此長律  
舊誤編

衣袂飄飄羽扇輕草廬蒲洒興懷清孤桐調逐秋雲杳  
老桂香陪夜月明附鳳攀龍雖寡術呼鷗喚鷺足尋盟



蘭臺一任無聲譽竹帛從教缺姓名白石清泉皆屬我  
黃花翠竹正關情日高丈六猶慵起石枕松風夢未醒

秋冬之交雷電大作

暮收行秋將滿秩解印榮歸嚴辦集清道迎冬俟臘來  
積雪嚴霜應有日遺蝗入地作年豐禾黍登場吾事畢  
九月中旬之望夕天大雷霆轟霹靂蝮螭盡出遊  
碧潭驚起蛟龍蟄炎炎溽暑勝暮春赤日行天欲焚炙  
玄英勒駕遽奔迴意恐中途例遭殛電掣金蛇走林莽

勢似金桴擊天鼓浮花浪蕊亂青紅痴蝶狂蜂恣飛舞  
唯貪過眼暫繁華寧慮來年百斯苦應是蒼生罪惡深  
過犯彌天致天怒我願天公憐赤子撫綏恩育宜如故  
渴飲饑食貴得時夏熱冬寒合常度寄聲司令省厥躬  
燮理陰陽勿乖悞

偶成

我先落魄何所為百年生計巢南枝迎風吸露飲山淥  
枕泉漱石吟新詩一絲不掛心自樂澹然性靈學無學

洗耳熟聽空山猿知心更有空山鶴漫漫長夜何時晨  
紛紛塵世何日清鋪糟啜醢難自強獨醒肯圖千古名  
君不見嚴光片石生白雲江湖夜永秋水深碧絲牽動  
潭底月直鉤釣斷人間心

寄王善甫

昔公曾住金芙蓉白雲為侶棲丹峰乾坤爽氣星斗胸  
手弄明月烟霧中十年燈下詩書工今年試藝棘闈中  
其氣似欲附冥鴻翅拍天水搖天風行將杖策朝聖主

豈止小展天南東願公獻賦明光宮直驅造化超洪濛  
筆陣縱橫誰敢攻八荒一掃空奸雄致君在上竭我忠  
要令四海歌重瞳有如醫王逞神功下與濁世鍼盲聾  
夢魂夜夜思見公凝望不來憂心忡人生飄忽浮萍踪  
百年光景轉眼中秋風道上會相遇便須握手一笑談  
空空

送洛陽陳秀才

蘇秦辯口人共知黑貂敝盡朋舊疎六侯相印幸得佩

一朝身幾埋荒墟賈生才調天下奇幾年獻策承明廬  
讒言入耳竟不用長沙抱恨何當紆玉川先生妙人物  
秋風破屋聊自居觀其大節死不變家中豈有擔石儲  
香山居士亦足數達哉達哉誰得如二程兄弟百世士  
孔孟之道賴以舒談經說理妙無盡天下學徒來挽車  
堯夫君實古淳士胸中包裹混沌初西京華麗推第一  
春光只滿二老閭前乎說客姑且置後來賢哲世所譽  
洛陽古俗稱多士遺風掃地今無餘陳生亦是嵩山客

從軍久戍江南  
緒彎弓走馬非所慕  
無事閉門長讀書  
抱琴辭我欲歸去  
因思往事難自攄  
歸與瞑坐倘神會  
為言每譚斯道未必不為嘆  
息涕淚增歎歎

招友人歸隱行

中郎一絕爨下音  
流水無思山無情  
仲尼一為麟後塵  
乾坤日月無光明  
聖賢自古多軼軻  
吁嗟吾子難獨鳴  
青山雖貴何足欽  
黑貂未敝君休驚  
片言不用脫屣去  
富貴於我浮雲輕  
日飲一瓢豈予辱  
日食萬錢非我榮

進退于道苟無愧對人何必面發頰幸有浮蛆之桑落  
為君斟酌平生誠幸有棲鸞之桐木為君彈出無弦聲  
一彈石澗漱寒玉再彈滿耳松風清酒酣更鼓三五曲  
魚龍鼓舞波濤縈男兒出處須磊落肯同兒女徒營營  
麻鞋布衲見天子誰能干謁公與卿指蹤利害談世事  
坐令海內皆昇平不將歸卧南山陰荷衣未必輸塵纓  
青山綠野總舊物白鷗玄鶴皆昔盟上飲千尋之澗瀑  
下採百歲之春英食之不饑復不老永為終古天地精

斯言雖鄙倘見聽便當盡決滄浪之水洗淨平生不朽  
無用之虛名

次韻靈源唯堂上人遊九龍山

羣峰嵯峨互相依九龍跳躍萬馬隨蒼松恠石倚天碧  
嵐氣日夕沾人衣幽花野草香澗谷山中寒暑自四時  
孝標當年隱其內勁節上與山爭奇紛紛餘輩方進取  
誰能退縮山之陔困來和雲卧白石醒後衝烟登紫微  
古今名利天下重此子似欲一手提白頭老僧好事者



泛覽景物裁為詩使我一讀重嘆息玩味展轉忘其疲  
世途擾攘吾已厭便欲命駕尋荒祠左驂白鹿右黃鵠  
與子相從不爾離

芙蓉堂次鄭氏子韻

芙蓉堂中見嘉什與君似有三生約高才磊落亦可憐  
誰謂今人不如昨我疑此子胸有天地春不然別有一  
邱壑男兒趣向貴如此慎勿戀他兒女樂一襟爽氣已  
逼人塵氛不假滄浪濯筆端滾滾龍蛇飛紙上霏霏烟

卷二  
霧落謫仙蘇二呼不來江湖夜雨蛩聲哀觀子新詩何  
所似秋空一鶴山崔嵬山靈起舞神鬼笑林泉變色雲  
屏開波光月色清可掬風露滿身寒蕭蕭還君此子不  
復言驪龍抱珠海底浴

樟木歌

發創府廳事幕官入山有巨木者咸取之予鄰有樟  
木亭亭若仙蓋固知歲年父老相傳歷五季趙宋云  
予暇日往還吟嘯於其下至是例辱斧斤賦長句弔

之

古木千年隱林麓傲雪凌寒久幽獨霜皮雖無四十圍  
中有昂霄氣盈掬孔明廟前色頗同草堂詩老慣撫育  
雨淋日炙歲月摩榦槁根摧忽顛踣樵夫芻客不我顧  
長伴蒼苔映寒綠今年公府創高堂梁棟求之苦不足  
幕官騎馬自入山匠者驅馳如鬼速自慚拙才復何用  
例辱斧斤蒙齒錄山翁因笑百無能一生支離同此木  
撫木三嘆為木言如此獎擢非我欲不願爾為秦皇阿

房宮不願爾為漢武黃金屋兩君富貴驕且淫是中唯  
蓄美女藏珠玉但願爾為幽人廬滿貯烟霞寄空谷有  
時惟聞讀古書凜凜忠義橫在腹有時惟聞彈古桐高  
調淒涼聲斷續否則構作承明廬歸然長在天子目廣  
延天下之英豪獻可替否干王祿此時不獨木爾榮四  
海蒼生盡蒙福

月夜泛舟

今夕何夕夜未終長空月出光瞳矐乾坤一色淨如鏡

水天上下磨寒銅晃如徑寸珠高耀馮夷宮清寒泣神  
鬼竒恠驚蛟龍我乘萬斛舟直入玻璃中雙漿擊空明  
孤帆颭天風狂吟發長嘯有似蘇長公湘水居其西采  
石居其東屈原與李白此地遺高踪我處二者間拍手  
招兩翁獨醒醉魄呼不返扣舷大呌應耳聾百年清賞  
誰與同茫茫千載情何窮採蘭芷兮水冷探明珠兮江  
空詩成嘆息無可語因風寄與天地之內古今不朽之

羣雄

芙蓉峰下有梵宮曰智者禪苑寺左右塘蓮花

盛開僧與文士賡和者多予次其韻

馮夷仙人冰玉瑩綠蓋雲鬟踏明鏡嫣然一笑隔烟波  
露濕臙脂容貌正道人心地亦清雅不染淤泥出正定  
豈無奇士同品題亦有山僧共涵泳芙蓉山色秋更癯  
斜日黯紅愁對影喚回西子昔年夢淡粧濃抹嬌相並  
不向湖山逞顏色天香橋死無人境有如禪僧懶出游  
白首甘心老鄉井

雪中見寄

六丁劍攪天地水倒瀉銀河洒寒雨舞空鱗甲動天風  
玉龍飛下玻璃圓乾坤萬里混清光廣寒誰借脩月斧  
奇絕異卉恣粘綴寧煩獼髓鸞膠補無朋懶棹子猷船  
何人肯扣袁安戶不愁僵卧酒杯空石鼎烹茶試鸚鵡

次韻

玄冥神人眼如水剪綺裁雲雨花雨翩然騎却玉麒麟  
東遊弱水西瑤圃手移泰華與祝融削平豈假巨靈斧

似嫌塵世有高下紛紛亂把瓊琚補夢裡渾疑月滿床  
醒來但覺雲封戶銷金帳暖阿誰家唱飲羊羔醉鸚鵡

和王存誠洞天長篇

神仙姓字留丹書神仙舊宅巖谷居昔曾躡險探仙迹  
問我俗慮何當除長生妙訣誠足學讀書萬卷將奚如  
曩思封侯食五鼎今愧半世成躊躇頑軀七尺走塵土  
多情白髮勞自梳因君贈我錦繡句夢魂日月金芙蕖  
桃源烟水但如昨欲尋舊路仍趑趄焉得瓊杯酌仙醕



與子共駕五色車碧雲望斷杳莫致臨川結網徒羨魚  
已辦刀圭生羽翼脫凡換骨乘天輿長揖安期赤松去  
握手大笑憑空虛童髻綠鬢垂兩耳天風一任寒蕭疎

### 春雪

百花憔悴東風寒六花爛漫開正繁東君似欲誇富貴  
瓊臺玉樹真珠闌綠楊無力晴拋絮青松不老雲生樹  
貪觀天女跨鸞歸失却仙人騎鶴處斜斜整整復霏霏  
却憶銜枚入蔡園奇功未立英雄老壯志雖存氣力衰

酒酣舞劍情難歇  
指點銀鉞莫教竭  
醉中猶自憶當時  
鵝鴨城邊一池月

童子良和徐曉山春暮行樂

落花香逕紅堆積  
鶯老慵歌蝶懶拍  
平生愛花復愛春  
為見春歸痛憐惜  
杖藜拚却十日遊  
春風滿袖雲生屐  
功名于我果何有  
棄置有如機斷織  
但喜杯中面發紅  
寧愁鏡裏頭添白  
空嗟口讀書萬卷  
却笑身不滿七尺  
長安富貴輕薄兒  
甘心老死黃塵陌  
大開冷眼看青山

旋拾枯枝煮白石有手不掣東海鯨何心更釣西江鯽  
麻衣草履萬念空深悟黃金與瓦礫因君語我徐曉山  
我亦聞名未曾識人生豈在見顏色但從意氣中相覓

美許士謙選壯丁有法二章

霜臺憲郎文且武曾侍繡衣持玉斧指揮猛士氣如虹  
要縛南山白額虎檄書下縣點壯丁十萬農夫勝羽林  
不跨黃牛騎白馬腰弓直入秋雲深喪亂以來無定止  
民物蕭條半為鬼郡縣誅求猶未已眼觀如宜淚如雨

於戲安得老天開太平盡戮奸貪天下治

烏臺憲史天下奇姓氏久為人所知風霜面目松栢操  
鐵石腸肚冰玉肌羣凶肆害于天誅潢池弄兵如小兒  
中原在處皆反側擄攘豈獨東南陞寓兵于農古王制  
憲史于此力主之羽書差兵以萬計頃刻而集敢後期  
厲兵秣馬在此舉指日要斬蚩尤旗廓平天宇清海嶽  
獻俘授馘朝丹墀東州老翁頭雪白拭目願見承平時  
南山有石踞如虎攜歸我欲鐫公碑

謝東陽太守趙子威牧守有理詩以美之

時為  
御史

東陽太守廉而忠風骨自是人中龍分明面帶冰霜容  
雙眸炯炯懸方瞳皎然一鏡磨青銅世間何物堪蔽蒙  
昔年眷顧恩寵隆繡衣持斧騎碧驄如今五馬白玉駿  
下飲雙溪制水東金鞍玉勒相磨礪大江南來財阜豐  
貢賦號稱天下雄邇來賊盜飛蟲虫潢池弄兵驚兒童  
貪官污吏復妄庸誅求何異蠱與蜂饕餮不已民心忡  
溫處在在懼兵鋒花溪小邑俱烟烽可憐州郡一掃空

明公撫安竭至衷至誠感物人共宗揚清激濁體大穹  
見善是輔惡乃攻不吐不茹恪且恭視民疾苦勞厥躬  
愛育脩至久不慵有如名醫治盲聾盲能再覩聾再聰  
又如大造運化工初不用力理自融十日一雨五日一  
風根器厚薄隨所逢春風桃李秋芙蓉白者俾白紅俾  
紅有疏可茹穀可舂化工何恩及吾儂父老感泣涕洟  
濛不圖見此矍鑠翁我願公心與天通舍其小者大是  
從廣陳方略達九重盡化四海之羣凶賣劍買犢為年

豐不然上書乞總戎駕御豪傑如轉蓬殄滅醜類無遺  
蹤四海混一車書同廓平天宇路不壅露布直到天子  
宮獻俘受馘太廟中脩文偃武開辟雍尅期封禪泰華  
峰大快義士平生胸令當建此補袞功論功合受大國  
封堂堂政府食萬鍾揖遜進退咸肅雍身佩安危勢位  
崇富貴豈下汾陽公海枯石爛物有終公之勛業高岱  
嵩公之令德傳無窮

題愛栢軒古風

軒前古栢顏色蒼鬱如車蓋當兩廂霜皮雖無四十圍  
老幹似有千尺強雲梢已足庇猿鶴月樹或能栖鳳皇  
孔明廟前曾識面飽沾雨露凌雪霜清陰時作長蛟舞  
壯氣每學蒼龍翔虬枝直上九萬里陰覆天下為清涼  
常疑半夜風雨響怒潮駕浪翻錢塘少馬女媧奏笙簧  
仙人環珮朝玉皇巋然俯瞰君子室鸞臺鳳閣遙相望  
連甍接棟眩青碧雕楹刻桷施鉛黃往來吟嘯謝樵牧  
冠蓋絡繹多金章嬌鞍俊馬勢豪逸弭貂鳴玉聲鏗鏘



內中有人貌異常  
我冠大帶美且臧  
紫霞之佩雲錦裳  
當軒危坐軒中央  
手弄瑤琴音琅琅  
耳邊雅調流宮商  
金盤承露傾天漿  
忽然飲我瓊琚觴  
柏兮特立堦砌下  
歲晚相對操愈剛  
豈無朱闌護文杏  
下視不啻兒女行  
奇才偃蹇不世出  
聲價豈減梗楠樟  
吁嗟爾柏後必昌  
大匠遇之未易量  
或為柱石或棟梁  
豈可久客卿相傍  
慎勿構作祖龍宅  
驪山突兀之阿房  
慎勿構作黃金屋  
茂陵秋風之劉郎  
惟悴珍禽貯奇獸  
多蓄美嫵閑嬌嬌

寧當架為幽人廬三重茅屋山之陽雖無精金乏良玉  
鉶儲斗粟書滿床床頭常留酒一缸壁上高懸琴一張  
讀書彈琴飲醇酎醉卧不夢封侯王死生無可無不可  
身無富貴名字香達則營建天子堂不傾不倚安四方  
招延英傑納俊良致君堯舜弼禹湯羣后歡呼趨廟廊  
要令華夏歌虞唐海宇雍熙萬姓康天錫百福壽命長  
子孫持此傳無疆栢兮女與有耿光再三語栢栢無語  
願言終久毋相忘

姜明德醫學錄任滿詩用美之并以醫之利害

語之

丈夫生世六尺軀饑餐渴飲當及期目觀鼻嗅耳司聽  
各職廼事爾勿離喜怒哀樂無妄施威賞之柄不倒持  
雍容進退動合宜天其相汝百福隨神清慮淡壽且耆  
顏色豐澤毛髮黥無不足兮何所望子孫妻妾皆歡怡  
寒溫風雨倘失時人心私欲復蔽虧堂堂正氣日以衰  
瘵癘始得乘其危膏肓一穴自古有區區二豎寧知斯

惜哉醫緩不務此倉卒遽謂疾弗治若藥瞑眩罔不愈  
縮手退避計或遲乃知用藥如用將用非其類悔曷追  
先巴烏附吾所用參朮之輩胡能為信乎藥者亦凶器  
古人不得已用之姜君職醫識此理愚民攀慕賢守知  
延年卻老學妙術回生起死叅神竒杏林春色香韻美  
芳葩漸滿東風枝他年丹石億萬斛慎勿往取虎竊窺  
我身剛強甚無恙半世落魄癖在詩賦性倔强成傲物  
胸次未掃平生癡高談驚世鄙俗訝左計失策羣兒嗤

疎狂往往激衆怒而我戲笑方嘻嘻豈無甘言悅人意  
胡塞巨口而不諛後先顛倒皆類此願將斯疾祈君醫  
願將斯疾祈君醫

辛丑歲軍亂後李元常賦詩傷感予次其韻


亂後依然舊城郭青山不老秋雲薄人民皆非可奈何  
歲月無情隨逝波短世功名何暇論相逢存歿驚相問  
夜寒兒女泣牛衣紫鳳天吳顛倒披訪舊驚心生百感  
兩脚如麻春不暖祗多幽滯哭酸風何人背面啼春紅

次韻以述老懷寄前人

龐老何曾入州郭布襪青鞋衣袖薄  
聘呼不起奈爾何  
心似無風井水波竹帛虛名奚足論  
草廬清夢毋勞問  
天風吹袂雲滿衣醉騎黃犢烟蓑披  
人生有情徒感感  
笑聲酒面春風暖可憐奔走牛馬風  
妄自粉飾誇青紅  
過李從道故居有感

數間古屋荒村道滿地蒼烟鎖芳草  
酒酣獨步憶當年  
幾逐西風訪詩老主翁去後寧復來  
戶外白雲人不掃

青山依舊事盡非斜日黃花為誰好



樵雲獨唱卷二